

光緒江西通志

江西通志卷一百八十

仙釋三

漢

吳丹酈邑人生時爲母所惡投白水河三日不死復養之因名白水十一歲母死居墓側五年哭聲振林木閒後遊羅浮青城諸山遇異人傳煉服術曹操召拜左奉駕郎不就遊終南山得篆文十六字曰孝哉吳丹卓行異人以番而鳳致道之所乃遊番至餘汗吳鳳岡遂結茅居之

舊志

張徽安仁縣東五十步有山名張古山張爲漢人學道於此十餘年仙去有丹竈存

楚東錄

晉

葛洪號稚川咸和閒王導辟爲散騎常侍不就求爲句
漏令取丹砂修煉昇平閒至鄱陽萬山中今之德興妙
元觀也見山川清奇委蛇環聚如龜鶴之形乃結褰鑿
井煉丹嘗自敘云戢勁翮於鸞鳳之羣藏逸足於跛騾
之伍藜藿有八珍之甘蓬蓽有藻稅之樂號抱朴子後
不知所終

白志

王遙字伯遼治人病但用八尺布帔敷地令瞑目坐土
卽愈若有邪魅畫地爲獄因召呼之其物自斃嘗佩雌
雄二劒分陰陽日揮之時外境疫癘甚盛惟騰空嘯氣
指示方隅遂止一竹篋長數尺未嘗開一夕大雨使弟
子錢永以九節杖擔之出衣皆不溼前有炬火引導登
一小山入石室中有謝稚堅繁陽子二人先在乃開篋

出古竹簀三枚分鼓之將別仍納篋中使擔之謝語遙
曰卿無久住人間遙曰早晚來也無何棄妻擔篋而去
閱三十年有弟子見其在馬蹟山中煉丹元康二年暮

春白日飛昇

名勝志 謹案神
仙傳遙都陽人

東陽名曉遠婺州人稚川弟子從至番山中太和間召
稚川不赴乃令東陽朝見試以仙術因吐丹一顆金光
眩目賜號明真先生又虞九霞青城人亦稚川弟子募
建妙元觀賜號通神先生

府志

徐公逸其名修真於德興之雙谿龍潭側潭深莫測旁
有巨石徐嘗坐臥其上歷數十年貌不改妻亦如之一
日忽辭眾同妻乘龍入潭歲旱遠近祈禱有蛇虺浮上
請去輒雨投疏有誤字卽泛出不納明宣德間孫清簡

需作詩投潭中曰塵世仙家兩隔離遙瞻白鶴舞東西
月明瑤草光浮洞春煖桃花香滿谿兩字功名垂竹帛
千年履迹印苔磯不知羽化何年代致使凡人心自迷
少頃和詩浮出云五代興亡正亂離新安一脈到江西
家君樂道居汶水大叔傳芳住柏溪猶子宦情黃菊徑
老夫垂釣綠楊磯自從背母朝元後春復秋還天地迷

安志

果仙久住饒衣帶皆綴雜果不停嚼人因號果仙城南
杜君平鬻果每招與之不索值一日詣杜曰余有佳果
幾樹足償君攜之行由芝山陰紆回四十餘里望見紅
鮮滿野隔一澗峻深不可渡杜懼仙笑曰君無緣遂別
而渡煙霞四生絕無人響杜循迹歸家已歷十餘年矣

安志

梁

左燮建業清谿港人齊梁閒慕吳鳳岡因徙居焉時人

爲作道院曰清谿觀年百有八歲卒

安志

晞明有戒行姓曹因稱曹禪師天監中自主峯至黃檗

結茅山中山有隴石晞坐石上五十年歲旱一日山下

老嫗哭曰禾槁矣晞令嫗折樹枝插田中明日水滿由

是乞雨者日至

安志

唐 南唐

附

鄭全福浮梁人幼不茹葷文宗時入縣東三十里靈巖
洞修煉後徙薄葉洞遊桃花谿見老人乘鐵船曰願借
船還人閒老人許之曰後三年當復來時已百餘歲語

門人曰死必葬我浮梁白水鄉及舉棺輕發之惟杖履

存焉

名勝志

道明鄱陽人陳宣帝之裔也少依五祖極意研窮初無解悟及聞密付衣益與盧行者即率同志數十人追至大庾嶺師最先見盧盧見師奔至即擲衣益於磐石上曰任君將去師舉之如山不可動乃曰我來求法非爲衣也願行者開示盧曰不思善不思惡正恁麼時阿那箇是明上坐本來面目師當下大悟禮謝回嶺獨往廬山布水臺經三載後始往袁州蒙山大唱元化初名惠明以避六祖上字故更道明

府志

慈濟儀鳳岡自岡中別師遠游師告曰逢寶即住遇應即止至鄱陽寶應山因止焉往來於督軍湖嘗與虎偕

行號伏虎禪師於湖北築舍爲別院以居後不知所終

名勝志

蕘山和尙懷讓第四世大安法嗣僧問如何是西來意

曰仲冬嚴寒如何是丈六金身曰判官斷案相公改德

傳燈錄

西峯好吹鐵笛鄱陽妙果寺塏其高十七丈峯吹笛於

塏尖風雨驟至行必與一鳥犬俱一日至白湖山以錫

杖插地俟犬遂成井號西峯井

名勝志

陳允升饒州人人謂之陳百年少而靜默十歲詣龍虎

山入道棲隱深邃人鮮得見天祐中人見於撫州麻姑

山計其去家七十年矣而顏貌如初刺史危全諷知其

異迎置郡中獨處一室時或失之嘗夜坐危謂之曰豐

城橘美頗思之允升曰方有一船橘泊牢城港今爲取之港距城十五里少選便還攜一布囊可數百顆因共食之危嘗市黃金郡中少不足用頗呵責其下允升曰無怒吾能爲之乃取厚紙以藥塗之投於火中皆成金後危與吳師戰允升告之曰慎勿入口中全諷不之悟果敗於象牙潭昇元時猶往來撫州山中

江淮異人錄
十國春秋

宋

張模字君範稱紫瓊真人兄根模皆撫仕模獨澹退聞太虛真人寓安仁熙春宮往求道弗納及見模在市中施丐者數千文乃曰可教後會眞州授以大道火候之祕遂隱去

安志

鄒希衍鄒源人出家元明觀天聖間遇吳人張台符授

以丹術四十年不置枕席年九十卒辭曰戊亥重逢日
乾坤透迴時幻身今已脫明日有丹梯後數年有道士
寄書與冠服至元明觀謝之書曰客歲辱相過也其徒
驚訝啟墓視之已尸解

安志

趙子甄安仁人幼出家至道宮得九轉還丹之術壽九
十餘卒葬沖虛山後三年有人遇於西蜀寄道友詩云
秦川蟬蛻已三回明月清風任去來寄語沖虛諸道友
芒屨竹杖不須埋啟冢視之棺已空

安志

汪一雷有道術邑人盧姓者捨宅爲觀以居之臨化自
題像云吾年七十七幾雨幾番風撇手清虛上一輪明
月中有發其墓者中止一履其徒程洞清亦能呼風叱

雨役使鬼神

安志

連可久安仁人父鼇好結納道友可久幼時有熊曲肱者令作漁舟調調成目爲神仙中人後居至道宮嗜酒能詩將化鰈指在盤面書云立化也不好坐化也不好惟曲肱而枕之便是蓬萊三島書訖血蹟染穿盤下志安萬直臣字道同號元隱不娶修真妙元觀觀有葛洪丹井紫氣沖騰人以爲毒不敢汲道同浚井見氣從砂顆中出卽取吞之後舉動異常一日水漲流大木於歲寒谿跳躍其上隨洪濤去數年後兄信臣於無爲州見之引入山中留宿及別與一囊曰明年大歉此可濟一鄉持至樂平明谿開視之糠也怒播於谿抵家告母母探囊底猶有存者視之良金也復往索得金鄉人稱爲淘金灘觀中道士病目一日忽至爲舐之光明如初留詩

云往往來來數百秋幻泡重作故人遊紫泥白雪尋常

事何苦人閒詠不休

仙史類苑

用言和尚寶倫尊者竝天台山壽昌寺僧天聖二年至
番永甯寺造石塢浚地下及三十餘尺築臺壘七層屹
立三十丈及成出一藥方名脾積丸授寺僧曰其藥可
留爲塢中鐙油費言訖去失其蹤迹

名勝志

悟本江州人自雲門參侍妙喜於時印可者多師私謂
其棄己欲去妙喜語之曰汝但專意參究有所得不待
開口吾已識也後益銳志以狗子無佛性話一夕將三
鼓倚殿柱昏寐閒不覺無字出口吻頓悟後日妙喜歸
自郡城師趨丈室未及吐辭妙喜曰這回方是徹頭也

安志

晉良饒州吳氏子開法於越州福果衢州超化海會靈

曜四刹

安志

佛印名了元字覺老浮梁林氏子幼稱神童長慕空宗
遂薙染初師寶積寺沙門日用試法華受具後游廬山
謁開先遲遂嗣之住雲居四十年神宗賜高麗磨衲金
鉢以旌師德後於元符元年正月四日一笑而逝

白志

嗣清安仁人幼出家貴溪松林寺有戒行孝宗召對賜
號惠禪師住持雲寶山名滿方外

白志

道璨字無文新建陶氏子咸淳間管主饒州薦福寺旋
住開先寺後復還薦福能詩有柳塘外集

府志

元

趙緣督德興人宋宗室子少習天官遁甲一日於芝山

酒肆逢修眉方瞳者索酒酣飲出丹書授之別去問姓名曰我扶風石得之也自是游東南海山注周易數萬言傳文懿獨推許之嘗乘青騾往來饒信衢婺間旅費自給所止多在隴邱宋濂劉基咸與之游洪武初坐化葬龍游雞鳴山後所著有仙佛同源金丹正理盟天錄諸篇今所存者革象新書而已

名勝志

吳全節字成季安仁人年十三學道龍虎山至元中從張留孫見世祖後成宗召見授元教嗣師後進元教大宗師元德真人全節雅好結士大夫推轂善類惟恐不盡其力至於賑貧矜乏未嘗以恩怨異其心卒年八十

二
明一統志

殷尙寶法名晁暘安仁人誠仙弟子能驅風致雨祈禱

祕訣游錢塘吳山遇翠微真人授以紫瓊真人復本篇
及丹訣號上清紫暉散人生於至德丙午化於洪武甲
戌有集虛詞并詩文數十卷

府志

可傳號正翁再興寺僧頽然而長犀骨突起聲出壓萬
人博覽儒釋諸書至元閒游廬山呂文煥延至其家同
入京召對問以佛法答以仁義治政之道世祖曰僧中
龍也賜玉環瓶盃金帛住薦福再住雲居歸老妙果寺

一日預與眾訣趺化

安志

紹睿餘干大慈寺僧號思庵嘗讀佛書人問之曰能言
其心又嘗讀儒書人問之曰能言其氣偈頌詩文援筆
立就延祐閒隨師玉厓振至廬山吳澄見而異之後住

南康圓通

安志

至仁字行中號熙怡鄱陽吳氏子年十八爲徑山書記
後住紹興繼遷崇報工詩文虞集稱其文醇正雅簡有
史筆宗門之子長也從報恩寺眞牧純公得度指空上
人曰再世天師也元叟曰仁書記虎而翼者也宋濂曰
虎邱尊者名澹居見性迴如牟尼珠臨終書偈而逝壽
七十四

稽古錄

明

尹蓬頭自言曾見宋太祖入汴時嘗爲神樂觀道士或
雪中流汗或大暑煨鑪不可測事甚多正德末居鄱之
晏公祠有樊姬時餽禮之一日寢其樓樊僕入城南遇
之見懷四麪果分其一及歸尹臥方覺袖猶存麪果三
焉鄱陽陳璜官南部時約同官十餘輩試其異同日召

齋俱至

安志

卓小仙蜀人善畫好吟詠舉止異常嘉靖中寓鄱士大夫喜與之游或納片石於口須臾成銀汞豐王召小仙書其屏曰披衣兼跣足開口笑王侯千年渾是醉一世不梳頭言人禍福輒驗一日辰刻別眾後有遇之萬年城下者

府志

太虛名紹郭樂平人通內典好吟詠縱游三十年歸住永甯寺士大夫咸禮之素戒飲洪武辛巳壽八十三一日呼酒大酣取像題曰這箇老僧有甚把鼻醜貌棱憎開眼瞋睡須知父母未生前本來面目在何處書已假寐而化

安志

杞楚材名似杞博覽儒書好吟詠洪武閒赴召回居鄱

之永福寺不疾而化著有瞻雲集若干卷宋濂爲序

府志

廷俊字用章樂平人年二十薙髮謁訢笑隱於中天竺
訢公歎曰子黃龍佛印流也至正末主錢塘之淨慈內
附後剡西僧道以事役集金陵師在行館於龍河明年
建元洪武徙寓鍾山端坐示寂闍維舍利無算歸塔南
屏山中有泊川文集五會語錄

列朝詩傳

克新字仲銘番陽人其學博通內外典洪武庚戌奉詔
往西域招諭吐番著有南詢稿夥南程文

列朝詩傳

至妙字湛然浮梁人俗姓黃永樂閒應詔舉高僧上命
賦塑騎雪虎羅漢詩稱旨賜衣帽宴儀部部官簪花戲
曰好花簪向僧伽帽料得師心也愛花答曰若使此花
能結子老僧原是佛陀耶在座抵掌隨續曰未許此花

開佛地恐將春色穢袈裟眾益奇之

府志

國朝

寓谷名元志餘千人菩提寺僧工詩康熙中

上南巡姑蘇寓谷見命賦香篆詩次日又書一人有慶四大字以進

上喜

賜御書金字心經令住平陽後遷金粟

南昌府志以上饒州府

上古

錢鏐顓頊元孫因進雉羹於堯堯封於彭城謂之彭祖又云彭鏐曾過彭蠡之濱造其名嶽今廬山是也徧遊洞府以窺聖迹已而把釣於臺上雙鯉化為雙龍冲天而去

廬山名賢傳

謹案錢鏐顓頊孫見列仙傳又云廬山有彭祖仙室當今壽春境此云過彭蠡當由

此而爲
之說

漢

蘇耽吳時道士居都昌縣西四十里元辰山煉丹上有
驢迹源馬驪洞丹竈石臼

名勝志

晉

文慧通女眞也修真於府城南三十里黃龍山一日跨
黃龍昇仙而去

安志

宋

陸修靜吳興人劉宋時居廬山簡寂觀有道術文帝慕
之製停霞寶輦賜焉明帝設崇虛觀通仙堂以待之至
卽求歸不許遂卒於京賜諡簡寂先生赴召時挾布囊
出逝之日布囊還懸廬山舊居巖樹上

名勝志

葉千韶字魯聽建昌人少隱廬山辟穀服氣常獨居忽有白衣人言君道德臻備仙籍褒昇當在人閒役使鬼神其後能致風雨救人疾疫其應如響安志

唐 南唐圻

劉混成字元和其先彭城人居白鶴山久之留弟子何玉守舍自入五老峯石室種木瓜爲食丹成年八十六而逝舉棺將葬空無人矣所居有丹井藥臼安志

黃洞源桃源洞人有道術時號三洞法師建元中入廬山紫霄峯下得石壇築菴居之安志

李

一作陳

道冲潯陽人不如葷酒結廬紫霄峯講說莊老

忽語人吾欲遠游且不返眾未悟競沮留之及午而逝

府志

丁元真字仲誠潯陽人得道能役鬼神嘗游康王谷谷有王莽時銅馬久而爲妖土人廟祀之其妖愈熾元真以三洞法徙其廟於澗西妖遂息按

熊德融字太光荊州人訪道至九嶷山遇異人遂隱廬山咸通二年逝安志

智常馬祖法嗣也目有重瞳以藥手按摩致目皆俱赤號赤眼歸宗後示滅敕謚至真禪師景德傳燈錄

道膺幽州玉田王氏子住雲居寺嗣洞山价嘗參洞山結茅於三峯經旬不赴堂山問其故膺曰每日有天神送食山曰將謂汝是箇人猶作這箇見解汝晚間來晚至山曰不思善不思惡是甚麼膺回菴寂然晏坐天神自此不見如是三日乃絕天復二年示寂謚宏覺禪師

增曰圓寂

傳燈錄

寰中住安義開陽禪院僖宗賜號性空

安志

道簡范陽人初造雲居謁膺公膺公大奇之令刻苦事眾於是徧掌寺務不妨商略古今以臘高居第一座膺將順寂主事問嗣者曰堂中簡主事與眾屬意在第二座而姑請師意師必辭也師既受記前卽攝眾演法主事大沮師知之一夕遯去有安樂樹神號泣詰旦眾追至麥莊悔而迎歸聞空中連聲唱曰和尚來也壽八十八餘示滅後廬州帥張崇施財建石塏於本山

指月錄

懷祐泉州仙游人受業於九座山陳禪師尋參石霜初居謝山復遷棲賢終於廬山謚元悟大師塏曰傳燈

傳燈錄

許堅字介石又號布衣道者唐末居簡寂觀得大魚卽全體烹而啗之後卒於金陵至景德中陳靖游廬山堅出謁於洪井山談甚洽及靖還金陵乃知其死已久志安楊保宗及笄許聘忽有悟入廬山崇善觀爲女道士南唐元宗聞之詔赴闕引見諸嬪御競施服玩金珠綵繡數逾千萬詔新其宇尙書郎韓熙載撰記賜額曰眞風觀詔臣下作詩送之旣歿舉棺甚輕蓋尸解云府志

譚紫霄泉州人有道術事閩王昶封正一先生閩亡隱

廬山棲隱洞南唐後主召至金陵賜號金門羽客并金

紫不受開寶六年卒著化書行於世明一統志譚峭作明

一統志稱紫霄不言號金門羽客亦不及開寶六年卒著化書行世事舊志不知何據峭字景昇爲唐司農洙子師嵩山道士得辟穀養氣之術游三茅山過金陵出所著化書授宋齊邱後入青城山仙去未嘗隱廬山也

紫霄未嘗著化書南唐賜號金門羽客階以金
紫皆讓不受金陵下卒於棲隱洞見十國春秋

宋

陳搏字圖南亳州人嘗游白鶴簡寂受易經心法於廬

山異人或曰異人卽許堅也

安志

劉得本字孝叔郢州人至五老峯遇異人引入山中還
舊所後不知所處

安志

洪志不知何許人通經史醫算爲道士隱廬山常騎青
牛因號青牛道士遇異人授以方術

安志

道詮安福劉氏子青原下八世慧輪嗣也髫髻禮本州
思和尚聞慧輪化被長沙時馬氏僭竊師冒險遠參後
輪歸寂乃回廬山於牛首峯下結茅爲室開寶五年洪
帥林仁肇請居九峯尋屬江南國絕僧徒例試經業師

之徒眾並習禪觀乃述一偈聞於州牧牧閱之與僚佐
議曰旃檀林中必無雜樹惟師一院特奏免太平興國
閒知南康軍張南金迎住歸宗雍熙二年跌坐白眾而
寂

傳燈錄

圓智嗣長慶稜姑蘇人江南李後主煜捨宅爲開先寺
太平興國二年延智說法爲開先第一代

傳燈錄

善暹臨江人雲門三世嗣德山遠羣稱海上橫行暹道
者

傳燈錄

正賢歸宗禪師也習經論過目成誦義亦頓曉大慈秀
稱爲經藏子後叩法眼一日入室

指月錄

可宣漢州人依那那覺一語頓契後住歸宗時郭功甫
任南昌尉相與甚厚而爲郡守所摺寄書功甫曰某世

緣尚有六年奈州主抑偏當託生公家功甫閱書驚喜
中夜其妻夢師入其寢失聲曰此不是和尚來處功甫
問之以夢告功甫取書以示果孕及生名曰宣老期年
記問如昔三歲白雲端過功甫始見卽曰吾姪來也雲
曰相別幾年曰四年雲曰甚處曰白蓮莊上雲曰何以
爲驗曰參參媽媽明日請和尚齋果六周無疾而卒指
錄

志芝庵主嗣黃龍南嘗結茅廬頂曰千峯頂上一閒屋
老僧半閒雲半閒昨夜雲從風雨去到頭不似老僧閒
志安

明

周顛仙建昌縣人幼患癲疾行乞南昌市中因號周顛

每遇太祖出輒擁馬首呼曰告太平一日命衛士覆以
甕積薪煨之火息啟視危坐冥然乃命居蔣山寺半月
不食寺僧以爲言太祖召之步趨若平時時陳友諒圍
南昌太祖復征之顛從行見江豚吹浪曰水怪出損人
多太祖怒命投顛江中久之復與眾俱來頻擲水水不
能溺太祖更與同食食畢別去壬申太祖病熱療治弗
效俄而赤腳僧詣闕言周顛及天眼尊者遣進藥服之
果愈復遣行人往廬山蹤迹之顛引行人入見宮室羅
列凡二十有八日適所至乃二十八宿出治之所婁宿
今處世閒治天下行人曰何以使上見信乃賦詩封固
以獻啟之其語不可解久之爲立祠廬山御製周顛仙
碑記碑在天池東北昇仙臺中書舍人詹希原奉敕書

丹篆額豫章書

徐道人即天池所祀四仙之一也嘗修煉於登雲寺志

周休休正德閒寓隆道觀因觀主為糧繫獄出囊中藥

如黍粒點銅十餘金助之自是絕迹安志

自恢字復初明詩綜豫章人元末住海鹽法喜寺洪武

初移住廬山工詩其題唐子華畫山水詩句云滿地松

陰春雨過好山青似若耶溪偶成云十里荷花紅勝錦

好山都在畫樓西列朝詩傳

雪嶠圓信臨濟三十世嗣龍門傳崇禎壬午司李黃端

伯請住開先有古鐘啞折信至復鳴廬山志

觀行號顓愚霸州人崇禎閒由五臺住雲居著有金剛

楞嚴四依解後游金陵遷化還葬雲居安志

• 憨山海印大師結庵廬山五乳峯下效遠公六時蓮漏
專修淨業後示寂曹溪既化之次年弟子居廬山者奉
全身歸塔五乳無何粵人官南康者復遷其龕還曹溪
將茶毗啟視之膚理柔輒鬚髮郁然乃加髹漆奉於六
祖真身之側去五乳葬時又二十餘年矣

列朝詩傳

紫柏大師真可字達觀住匡山時聞憨山以宏法坐成
嘆曰法門無人矣南康太守吳寶秀以礦稅被逮其妻
投繯死嘆曰奄橫至此世道不可爲矣乃決策入都謂
人曰海印不歸我爲法一大負礦稅不止我救世一大
負傳燈錄不續我慧命一大負捨此一具貧骨釋此三
負不復走王舍城矣

列朝詩傳

天隱住廬山常抱疾有詩曰雨餘白石氣如炊濃綠陰

中霽景遲經月未行庵下路樹禽引子去多時王偉守

南康請住兜率寺卽他徙

九江志

國朝

天然函是番禺曾氏子明崇禎癸酉舉人公車過廬山
參空隱獨契旨己卯冬落髮於歸宗明年入羅浮遷雷
峯順治癸巳復入匡廬領棲賢院戊戌復還雷峯繼主
華首海幢芥庵丹霞諸刹辛亥秋知府廖文英仍請住

持歸宗

府志

今釋字澹歸杭州人姓金名堡明崇禎庚辰進士入

國朝爲僧受天然記蒔開丹霞於粵東旋歸廬山淨成精
舍後示寂當湖其徒奉靈骨葬廬山天公衣蓋塋之旁
粵東僧眾復移塋於丹霞之海螺峯著有徧行堂集

志

石鑑覬曹洞三十五世博山四世天然是嗣俗姓楊氏
新會人爲諸生有聲忽有省棄俗徧參濟洞諸老至雷
峯得顯印證授記開法長慶後遷棲賢惡諸方馳逐聲
利與眾衲子栽田博飯有古德風府志
心壁淵臨濟三十三世嗣天嶽晝雲南人康熙壬申秋
在洪州憩雲庵應巡撫宋犖請住開先癸未

賜般若心經供奉丁亥迎

鑾淮上從至松江

敕賜秀峯寺額精心禪悟博學工詩府志以南康府

周

匡俗字子孝

豫章記作匡續一名匡裕字君平

一曰子希師老聃得久

視之道結茅虎溪修煉七百年定王問太史伯陽神仙
之在世者伯陽舉五嶽諸仙以對先生其一也因召之
不應又二百年威烈王以安車迎之使未至先二日白
日輕舉使者至惟得其草廬焉人因呼爲匡山又曰匡
阜兄弟七人皆有道術漢武元封五年南巡射蛟潯陽
封爲南極大明公稱廬君有廣福觀以專祀先生者在
香谷西一里許潯陽記 寰宇記 白志舊案惠遠記
俗生殷周之際結廬山上因名廬山而
安志謂俗父平野王當秦末同吳芮佐漢定天下而亡
封俗於潯陽及武帝南巡封太極大明公竟以爲漢人
不知何所本也

漢

劉越嘗邀康阜過其居云山陰有石高三尺吾宅也扣
之卽見我焉如其言往叩之果有二童子引見越越冠

元玉冠朱紱劔佩飲阜以玉酒三爵延生湯一啜阜心知其異欲留居之未出口越曰子姑去他日來居未晚也乃出石在太平宮殿階下因號其石曰劉越洞天今不知所在或曰康阜卽匡俗也

廬山志

王長趙昇九徵志云王趙二真人理第六十九福地廬山天師告諸弟子曰爾等俗態未除其九鼎之要惟付王長也趙昇求爲弟子天師以七事試之遂得入室後與王長同昇太乙天中

仙苑編珠注

王喬漢葉縣令隱於德安崑崙山巔朝斗丹成仙去遺有石焉觀後有月窟東西二湖大紅牡丹花至今尙存云是喬手植

林志

九仙不知何許人兄弟九人寓德安博陽山之巔丹成

同日昇舉今所居處名九仙臺

安志

劉德本鄂州人避亂廬山見鹿裘道者與行至五老峯下深澗中有大石門正闢一老人扶策倚門立見德本卽邀與俱入乃大石洞也洞中別有天地風日和煦花樹芳蔚夔異人境行二三百里有大宮殿金碧煥爛呵衛嚴整榜曰紫元景曜之門老人曰此九天使者所治也德本欲求見使者老人曰不可因復出門逡巡失老人及道者所在

安志

劉綱漢時仙官謫居蓮花峯下奉章上帝敕德化縣令張某之死又云上虞縣令也與妻樊夫人俱得道術二人俱坐牀上綱作火燒屋從東邊起夫人作雨從西邊

上火滅

仙苑編珠注謹案太平廣記劉綱官上虞令其所教則德化令也

度索君真仙也昔有人見一白布單衣者高冠冠似魚頭度索君曰昔廬山共食白李未久三千年日月易得使人悵然去後度索君曰此南海君也

安志

李鎮居雞籠山山上有石雞冠距如生鎮常玩之一日雞忽無故自毀裂鎮曰雞既如此吾何以全果卒

安志

晉至隋

楊羲修真得道與紫微夫人諸仙游諸仙各授學道口訣并說羣仙事迹楊錄其書司馬朗得之嘗有雷電光怪陸修靜又得之遂隱廬山

安志

董奉字君異閬之侯官人居廬山爲人治病不取錢重病愈者使栽杏五輕者一數年計得十餘萬株後杏大熟作一草倉於林榜示人曰欲買杏者不須報奉但將

穀一器易杏一器有置穀少而取杏多者有虎吼而逐之奉得穀盡以散貧者歲大旱縣令丁士彥齋酒脯請禱奉曰貧道屋皆見天恐雨至何堪令曰先生但致雨當爲架屋明日令人吏運竹木起屋立成聚土作泥擬數里取水奉曰不須爾暮當大雨暮果然令女爲邪所魅投奉治之曰若得愈當以待巾櫛奉然之忽一鼯陸行詣病者門使斬之遂愈納爲妻奉每出妻不能獨居乃乞一女養之年十餘歲奉一旦竦身入雲中去妻與女賣杏取給奉在人間三百餘年顏狀如三十時人

傳

馮伯達豫章建昌人世奉孝道精進濟物元嘉中自都下寄載鄉人還南行至梅根阻風連日伯達謂船主曰

欲得速至家但安眠慎勿開眼其夜聞舫下刺樹杪而不危抗有竊窺者見兩龍挾梁翼船迅若電逝未曉到

舍伯達尋入廬山不返

真仙通鑑

張施深棲隱谷中學老子術梁武帝聞而嘉之詔以其

閩爲康王觀據嶄絕俯泓渟神龍弄珠光照紺髮

周景式記

王靈輿九江道士始居五老峯夜有神人謂曰得道者

各有其地如植五穀於沙石中則不能成靈輿問何地

可棲曰朱陵之上峯紫蓋之鄰岫可以沖天矣遂遷衡

嶽中宮天監十一年七月十三日白日飛昇

真仙通鑑

蔚煉師名文光大同中修真得道白日昇舉人皆見之

今龍山丹竈松壇石室遺蹟尙存

彭澤縣志

慧遠姓賈氏雁門樓煩人年十三依舅令狐氏通六經

尤善莊老二十一聞沙門道安講般若經豁然開悟與弟慧持投簪受業太元六年立精舍於廬山以去水遠舉杖插地泉湧時亢旱於池側誦海龍王經有神蛇浮水俄大雨因名龍泉精舍永師先居廬山西林欲邀同止而師學侶寢眾永謂刺史桓伊曰遠公方當宏道而貧道所居隘不可處其夕大雨雷震詰旦林麓廣闊素沙布地梗枿文梓充布上下不知所自至伊乃爲建刹名其殿曰神運以在永師舍東號東林製五銘刻於石先是陶侃刺廣州時漁人於海中得金像文殊及移督江州迎像還潯陽舟近而溺師禱之忽浮出迎至神運殿造重閣奉之因製文殊瑞像讚嘗謂諸教三昧其名甚眾功高易進念佛爲先旣而不期而至者道生等十

八人結社念佛復率眾百二十三人同修淨土之業造
西方三聖像建齋立誓令劉遺民著發願文王喬之等
爲念佛三昧詩以見志有行者嘗侍師善驅蛇蛇爲盡
去因號辟蛇行者有一虎往來時見形迹未嘗傷人人
號游山虎師居山三十年迹不入俗義熙十二年七月
晦夕方從定起見阿彌陀佛告曰汝七日後當生我國
卽寢疾製遺誡令露骸松林之下卽嶺爲墳八月六日
順寂弟子不忍露屍與太守陶侃奉全體葬於西嶺素
石爲塋謝靈運作碑以銘遺德張野作序自稱門人宗
炳復立碑於寺門以表德業所著有經論諸序銘贊詩
記凡十卷號廬山集唐大中二年追諡辨覺大師南唐
昇元三年追諡正覺宋太平興國追諡圓悟大師凝寂

之塏

蓮社十八高賢傳

九江府

三

慧永西林法師也河內繁氏子年十二出家師竺曇現
初習禪於恆山與遠公同依安法師太元初至潯陽刺
史陶範捨宅爲西林以奉師師於峯頂又別立茅室至
其室者嘗聞異香因號香谷一虎同居人至輒驅去及
遠公來龍泉分居東西二林影不出山者三十年何無
忌鎮潯陽至虎溪請遠公及師遠公持名望從徒百餘
高言華論舉止可觀師衲衣半脰荷錫捉盃松下飄然
而至何謂眾曰永公清散之風乃多於遠師也義熙十
年在疾忽斂衣求屣曰佛來也言終而化異香七日方
散年八十三葬於寺之西南唐元宗詔重建塏亭追諡
覺寂大師實智之塏

高賢傳

慧持遠公同母弟也幼讀書一日所記常敵十日年十八與兄同事道安止廬山師身長八尺衲衣垂膝徒屬三百師爲上首瑯琊王珣以書問豫章太守范甯遠持二公孰愈甯曰誠謂賢兄賢弟珣復書曰但令如弟仍未之有況復賢邪隆安三年辭兄入蜀遠曰人生愛聚汝獨樂離師曰滯情愛聚者本不應出家今旣割欲求道正以西方爲期耳至成都郫縣龍淵寺大宏佛法升其堂者號登龍門義熙八年順寂年七十六臨終以東閒經籍付道宏西閒法典付曇蘭

高賢傳

道生魏氏鉅鹿人幼從竺法汰出家年在志學便登講座初依廬山後與僧叡慧嚴慧觀等從羅什受業關中乃立善不受報及頓悟成佛義又著二諦論佛性常有

論佛無淨土論應有緣論又以法顯三藏所翻泥洹經
先至經云除一闍提皆有佛性謂是經來未盡耳乃唱
闍提之人皆得成佛僧黨以爲背經遂擯而遣之師正
容誓曰若所說背經當見身厲疾若與實相不背願舍
壽之曰據獅子座及後大經至諸師皆媿服被擯入虎
邱山聚石爲徒講涅槃經石皆爲點頭旬日學眾雲集
師於寺請屬賓律師譯沙彌塞律傳於世復投廬山預
蓮社久之還都止青霞寺時王宏范泰顏延之相從問
道元嘉十一年於廬山升座說法將畢眾見塵尾紛然
墜地隱几而化宛若入定諸師聞之益信前誓有證翌
日葬於廬山西阜

高賢傳

曇順黃龍人幼出家承訓羅什講釋羣經妙盡色空無

著之旨什歎曰此子奇器也後來廬山同修淨業甯蠻

校尉劉遵孝於江陵立寺要師經始盛宏念佛三昧之

道宋元嘉二年別眾坐逝異香滿室年七十九

高賢傳

僧叡冀州人游學諸方行經蜀西界爲人所掠使牧羊
有商客異之疑是沙門及問以經義無不綜達卽出金
贖之後至關中從羅什諮稟經義久之入廬山依遠公
修淨業旣而適京師烏衣寺講說眾經宋彭城王義康
要入第受戒師曰禮聞來學王乃入寺祇奉戒法謝靈
運篤好佛理嘗以經中字音求證於師因爲著十四音
訓梵漢昭然元嘉十六年無疾告眾曰吾將行矣面西
合掌而化眾見臥內一金蓮花倏爾而隱年八十五

高賢傳

曇恆河東人童孺依遠公出家年十三便能講說內外
典籍無不通貫德行清孤物情推服嘗有羣鹿馴繞座
隅自入廬山專志淨業義熙十四年端坐合掌厲聲念
佛而化年七十二

高賢傳

道昞潁川人陳氏幼出家爲遠公弟子該通經律兼明
莊老志節孤峻言與行合念佛三昧究心無閒義熙十
四年豫章太守王虔入山謁敬請爲山中主用紹遠公
之席眾以道源法嗣咸知宗仰元嘉十三年集眾念佛
就席而化年七十一

高賢傳

曇詵廣陵人幼從遠公出家勤修淨業兼善講說注維
摩經行於世嘗著窮通論以明宿修述蓮社錄以記往
生又能別識鳥獸毛色俊鈍之性洞曉草木枝幹甘苦

之味妙盡其理人知其有密證云元嘉十七年集眾謂
曰自建寺以來至此五十年吾之西行最在其後卽跏
趺念佛百聲閉息遂絕年八十高賢傳

道敬瑯琊王氏祖凝之刺江州遂從遠公出家年十七
博通經論日記萬言每歎戒律終身難全願淨六根但
栗一戒以爲得度之要遠公知其堅正許之篤志念佛
早夜弗替遠歸寂乃入若邪山宋永初元年謂眾曰先
師見命吾其行矣卽端坐唱佛而化眾見光明滿室彌
時方滅年五十二高賢傳

佛馱耶舍罽賓國婆羅門種有沙門至其家乞食父怒
毆之遂手足攣蹙巫師謂坐犯聖賢卽請沙門悔過旬
日乃瘳因令耶舍出家年十五誦經日至萬言以分衛

廢業爲憂一羅漢代其乞食年三十復從舅氏學五明
論世閒術至沙勒國而羅什至乃從學阿毘曇論十誦
律後入長安姚主別立省寺於逍遙園四事供養一無
所受時至分衛一食而已時什譯出十住經師更相徵
決辭理方定師髯赤善解毘婆沙論時號赤髯論主秦
宏始中譯出四分律長阿含經義熙八年來廬山入社
復還本國以虛空藏經一卷寄商客至涼州

高賢傳

佛跋跋陀羅姓釋迦迦維羅衛國人甘露飯王苗裔也
幼亡父母出家年十六博學羣經深達禪律與迦達多
遊屬賓時姚秦沙門智嚴至屬賓親法眾清淨慨然東
顧曰孰能遂我所請化流東土僉應之曰跋陀羅其人
也嚴乃邀師同行從鳩摩羅什於長安秦太子泓請師

於東宮集眾說法忽謂弟子曰吾見本國五舶俱發眾
謂妄言因擯之與弟子慧嚴慧觀四十餘人至廬山香
谷遠公請師於東林譯出禪教諸經後西適江陵果見
天竺五舶至及還都立道場寺吳郡內史孟顓右衛將
軍褚叔度請師主譯華嚴梵本與沙門法業慧義慧嚴
慧觀等爲筆授成六十卷有二青衣日從池出灑埽研
墨師先後譯出觀佛三昧經泥洹經修行方便論及法
顯所得大僧祇律凡十五部宋元嘉六年念佛而化塏
於廬山北嶺

高賢傳

曇翼餘杭人初入廬山依遠公後往關中見羅什還會
稽入秦望山誦法華經十二年感普賢大士化女子身
特來相試郡守孟顓聞於朝敕建法華寺俗姓王七歲

出家以披有雉毳因名以翼

東林寺志

曇邕姓楊關中人形長八尺雄武過人來廬山師遠公
內外典籍無不綜習立茅屋於山西以自居弟子曇果
一夕夢山神求受戒法果曰家師在此可往求之邕忽
見一人著袷衣風神端雅從者三十人乞受戒師爲說
法授五戒畢神以外國二鋤爲贖而去後往荊州行化
卒於竹林寺初仕苻秦爲衛將軍堅南敗遂從道安出
家次事遠公

稽古錄

僧濟入廬山精悟深要遠公歎曰紹隆大法其在汝乎
及在疾遠公以燭遺之曰汝可憑此建心安養師執燭
停想延僧誦淨土經至五更以燭授弟子元弼隨僧行
道頃之覺自秉一燭浮空而行見阿彌陀佛接至於掌

悉見之旦就山尋訪乃云珍卒後因檢經中始知往生

事

續高僧傳

法歸廬山峯頂寺僧也本住襄陽漢陰偶夢有神期往廬山遊歷既覺尋夢而往至廬山樹石寺塋宛如前夢依而結宇晨夕繼業遂終山舍

續高僧傳

慧景清卓出類不交道俗及卒後乃返握兩指人有持者雖伸還屈卒之晨山峯松樹並雨甘露今名甘露峯是也

府志

道融梁初人住東林寺篤志沈博遊化江陵晚還廬山獨宿逆旅時天雨雪中夜始眠見有鬼兵其類甚眾中有一鬼將帶甲挾刃據羌牀坐乃對融厲色揚聲曰君何謂鬼神無靈邪速曳下地融默稱觀世音聲未絕即

見所住牀後有一天將可長丈餘著黃皮袴褶手提金剛杵搥之鬼便驚散甲冑之屬率爲塵粉

安志

法充姓畢九江人住廬山化城寺修定自非僧事未嘗妄履每勸僧眾無以女入寺上損佛化下墜俗謠不聽充歎曰正教不行義須早死遂於香爐峯自投而下誓粉身骨用生淨土後有人上峯頂路望下千有餘仞聞人語聲就而尋之猶活迎還至寺僧感其死諫嚴絕女人語聲就而尋之猶活迎還至寺僧感其死諫嚴絕女

蹤開皇末卒

續高僧傳

智光江州人開皇十年敕召入京仁壽創塏召送循州途經許部舍利於輿忽放光明高出丈餘比至番州寄停寺內其夜銅鐘自鳴食時方止既達循州道場塏寺天降甘露於塏邊樹上凝光曜日還京以法自娛晚厭

談說尋還廬阜卒於山舍

豫章書

智錯姓夏侯豫章人住廬山造大林精舍又住西林寺
兩處監護皆終其事然守志大林二十餘載足不下山
隋文下敕召稱不赴後豫章請講亦堅辭之云吾意終

山舍豈死城市未幾卒

府志

慧達姓王氏襄陽人幼出家律行精操主西林擬造重
閣七閒誓用黃楠眾難之忽於境內下巢山見長林滿
谷悉是黃楠但窮澗幽邃無由出道師尋行崖壁閒見
一竇可五尺許光明晃耀盡以眾木投之乃達於江閣
遂成無何南向忽偏斜三尺諸匠取正無方忽猛風自
石門礪來吹閣還正眾咸異之大業六年七月晦日舊
疾忽增七日倚臥異香滿室閣中尊像並汗流至地眾

見此瑞審師當終具以奏聞卒年八十七

法苑珠林

大志開皇十年來遊廬嶽住峯頂寺介爾一身不避虢

虎善文藻撰願誓文七十餘紙

安志

唐 南唐村

邠法遵簡寂觀道士道行精確獨力檢校已歷數年忽夢元中法師謂之曰汝無人力甚見勤勞今有二童子所恨年小耳既覺出山過王某家有孩子年方一晬見法遵抱其足不肯捨遵去晝夜啼號遵復至則欣然後數年父母卽捨爲童子又一小兒姓劉眼有五色光父母疑其怪異因灸眼尾其光遂絕已四五歲亦捨在觀中相次入道果符元中夢授之語

安志

薛肇不知何許人與崔宇讀書廬山宇尋擢第授東畿

尉經三鄉驛忽逢肇敘舊薛曰貧居不遠能左顧否宇
從之初入一小徑甚荒涼更三里閒殿閣森沈薛先入
有數十人擁接升殿乃召崔開筵女樂四十餘輩見一
女彈箜篌上有十字天際識歸舟雲中辨江樹崔默記
之薛問中有所悅否以箜篌者對薛曰他日與君及明
送之官路別去崔至官求婚得柳氏女嘗疑曾識而不
記其處命取箜篌理曲見十字詩在焉問其故云其時
染疾夢中見一使人追云西城大仙陳谿薛君有客五
百里內解音聲處女盡追可四十餘人卽隨去遙見薛
與崔少府在殿同飲覺來疾已除卻各話其事方知薛

君已仙

神仙傳

蔡尋真李騰空蔡爲侍郎某女李爲宰相林甫女貞元

中同入廬山蔡居詠真洞天九疊屏南李居九疊屏北
凌雲峯下並以丹藥符籙救人疾苦三元八節會於詠
真洞講道九江守許渾以狀聞昭德皇后賜金帛闢土
田已而蛻去門人收簪簡瘞於舊居鄉俗歲時祀之後
昭德崩許渾入朝因請賜觀額詔以詠真觀爲尋真觀
騰空所居爲昭德觀

豫章書

茅安道廬山道士曾授二弟子以隱形洞視之術曰資
爾學道卽不得盜情而銜其術也苟違吾教能令術窮
二子至潤州謁韓晉公滉舊志誤提弛慢縱誕韓大怒縛之
二子行其術果不驗韓詰問術師姓名而安道已在門
矣龐眉美髯韓不覺離席迎之安道曰二子愚駭干冒
尊嚴請詰而愧之然後行刑韓致二子階下械繫甚堅

安道就取硯水嚙之二子化爲雙黑鼠自變巨鷲攫二

子冲飛而去

安志

崔道人久居廬山積香數斛一日盡發命弟子至五老
峯下徐焚之默坐其旁煙甚不相辨忽躍起已在峯頂

上

安志

李雲卿不知何許人先隱西山後徙居廬山北阜以醫
藥救人病苦不圖權利一日采藥至深山中忽睹一人
圓冠紫袍相揖曰我此山之神也九天使者以汝救物
有功使我授汝太清九華神丹太微天帝君飛天綱步
地紀金簡玉字一通自此當絕迹人間精專修持雲卿
由此遠離世俗於後唐同光二年白曰仙去

真仙通鑑

道睦姓周汝南人隋開皇十二年依將軍周羅睺遠居

廬嶽止東林心願匿迹無事音塵山寺法擁勸引非一
遂不拒命宏道度人修建僧坊四時無絕隋季寇擾獎
撫門徒如初不替貞觀二年示疾夜忽天星大墜翌日
喚上座委以後事跏趺而卒諸殿閣門一時自開異香
滿寺七日始歇年八十二

續高僧傳

智閑青州人初依百丈海海卒去依潞山祐無所悟遂
泣辭潞山抵南陽覩忠國師遺迹遂憩止焉一日因山
中芟除草木以瓦礫擊竹作聲俄失笑閒廓然省悟遽
歸沐浴焚香遙禮潞山贊曰和尚大悲恩踰父母當時
若爲我說卻何有今日事邪後謚襲燈大師

傳燈錄

熙怡姓曹桂陽人大厯五年躋五老峯望彭蠡臨瀑布
乃構凌雲精舍爲經行之所趨風望景攀危輦重翼如

而至者難以數計積十餘年乃止大林精舍杖履衣巾
屏居一室行住坐臥無非道場貞元中歸東林戒壇院
丙子歲七月召門弟子曰吾隨化還須與寂滅

府志

靈徹韋丹爲江西觀察使徹住東林丹以詩寄之曰王
事紛紛無暇日浮生冉冉只如雲已爲平子歸休計五
老峯前必共君徹酬曰年老心閒無俗慮麻衣草坐亦
容身相逢盡道休官去林下何曾見一人丹與徹偕和
詩什頗多韋序曰徹公近以匡廬七詠見寄皆麗絕於
文圃七詠者蓮花峯石鏡虎跑泉聰明水白虎洞鐵船

峯康山廟也

雲溪友議

神湊京兆藍田人具戒於南嶽希操參禪於鍾陵大寂
大曆八年詔配江州興果寺從僧望移隸東林寺元和

十二年卒師自興果訖東林一孟齋一榻居衣麻寢菅如坐七寶檀施來無虛月盡歸寺藏與大眾共之迨啟手足目前無長物禮佛四十九年凡十二時未嘗闕一門人道達利警元審元惣等封墳建塋思有以識之託

白居易爲銘

豫章書

法藏姓周南康人穉齡研尋史籍於醫方尤精有僧臥疾幾不救藏切脈處方信宿平復其僧善談元自爾萌出塵之意後辭親受戒謁大寂禪師言喻若石之投水脩然北下入廬山登五老峯獨止寒林采橡栗掬溪澗數年有二仙乘雲而來終日談論寶厯中示滅年八十

二安

志

若虛隱廬山數年持經不出石室江南李氏欽尙其道

累徵終不降就惟言老僧無能甯銷王者歸心若更相
呼竄入深山矣賜衣服則避讓香則受之以乾祐中盛
夏坐化身不沮壞今湓城人供養影相焉

安志

行因廬山之北有巖如五指下有石窟可三丈餘師晏
處其中因號佛手和尚不度弟子有鄰庵僧爲之供嘗
有異鹿錦囊鳥馴擾其側江南李主三召不起乃堅請
就棲賢開堂不逾月潛歸一日微疾謂旁僧曰日午吾
去矣及期下牀行數步屹然立化李主備香薪茶毘塋
於巖陰師爲六祖下八世鹿門真嗣

指月錄

宋

劉伯五宋時人修真於浩山山有煉丹井昇仙臺

彭澤縣志

黃知微字明道江州人得道佯狂人謂之黃風子一衲

百結寒暑弗易嘗攜兩囊隨所得雜投其中而不臭名
曰錦香又善噫氣輒經時不絕響徹雲漢素不攻詩而
多佳句如谿雲拂地送殘雨谷鳥向人啼落花萬里碧
雲開暮色一條銀漢在天涯之類皆可諷詠死瘞宮側
後從蜀寄書山中開函皆喪亂後道士姓名也

安志

劉虛谷著丹還篇能以智慧性斷煩惱根乃至有無通
用之祕朱子嘗與談易論還丹之旨後月夜登青牛洞
絕頂端坐而逝

安志

胡用琮太平宮道士遇道流於雲堂留之飲既醉道流
以刀剗土漚酒漱津和之成墨以授用琮投之几上鏗
然有聲翼日視之紫磨金也其所剗土處有泉出焉甘
而不竭故謂其堂曰授墨堂泉曰墨仙泉用琮初以墨

磨酒飲其半宿疾頓愈由是厭人閒事學道年七十顏

如童子

安志

皇甫坦字履道臨淄人入蜀居峩眉山嘗暮行風雪中聞有呼之者顧見一道人臥小庵中因留與抵足眠比曉道人告曰他日可訪我於靈泉觀後訪之乃妙通真人朱桃椎也盡得其祕顯仁太后忠目翳召見慈甯殿坦爲噓呵布氣卽翳脫瞭然又詔療仙韶甄嬪嬖亦卽愈辭還山兩宮賜賚皆極厚不受復召入賜紫衣絲履御書黃庭道德陰符等經詔築室廬阜兩宮賜金爲費不受又賜御書清虛庵額詔繪像御贊之內禪後召見康壽殿賜沈香二百兩御畫芝草扇御書贊乾道改元賜御書靈寶經壽聖皇后所書清淨經三年奉詔禱青

城還山屢詔不起淳熙五年九月坐逝

豫章書

白玉蟾瓊州人

續文獻通考云福建閩清人也

姓葛名長庚嘗任俠殺

人亡命之武夷事陳泥丸爲道士自稱靈霍童景洞天

羽人善幻好詭誕之行往來廬山閬山南北諸佳勝並

有題詠而太平宮爲多紹定己未冬解化賜號養素真

人

安志

楊權字正夫盱江人自少穎悟不羣聞張真牧有道行

往從之授以九返之術後舟次九江泥沱嘴遂結茅修

煉其中時大疫施以符水輒效嘉熙四年語其徒曰吾

今歸矣乃留偈曰七十九年夢覺五湖四海隨緣撥轉

雲頭歸去曉日東生亦然危坐而逝咸淳中封通慧孚

惠真人祠在九江名壽聖觀

豫章書

緣德字道濟錢塘黃氏摺紳子也少棄恩榮親莫能沮
祝髮於朗瞻院受具於天台始習禪那於天龍順德大
師尋往江表值洪進山主印忽然大悟江南國主聞其
風大建梵刹請師住持後值宋將曹翰下江南大統貌
貅入寺師覆眾畢獨端趺坐翰至仗劍喝曰曾見殺人
不眨眼將軍否師曰汝見不怕生死老和尚麼翰棄劍
禮曰眾僧何在師曰聞將軍來故遁翰曰怎生他來師
曰鳴鐘則見翰遂鳴鐘不見一人問曰眾何不來師曰
老僧鳴則來矣翰請師鳴鐘眾果俱至翰怪之禮問師
云將軍鳴鐘有殺伐之聲翰深傾伏之一日集眾告曰
吾寂後以青石爲塏塏紅吾當再至說偈趺坐端逝

通圓

勝紀

慧朗江南相宋齊邱請開堂化城寺青原下九世文益

法嗣

景德傳燈錄

居訥梓州人初以義學冠兩川耆年多下之會有禪者
自南方來以祖道相策發因出蜀放浪荆楚無所得復
西至襄州洞山棲止十年住圓通時仁宗聞其名詔住
淨因院將親召對師稱目疾不赴舉大覺連以自代熙
甯四年無疾而化

指月錄

懷賢温州人居雪竇熙甯三年劉述守九江以圓通召
賢欣然從之工詩字所著頌文集凡五卷

安志

常總元豐初革東林律寺爲禪席王學士韶出守南昌
欲延寶覺心公公舉總代總宵遁去韶期必得之不得
已應命其徒曰遠公嘗有讚記吳滅七百年後有肉身

大士革吾道場今符其語矣住東林十二年厦屋金碧
照耀煙雲叢林之盛近古未有今過虎溪者望總全身
無不致景行焉

安志

大覺連住阿育王寺初遊廬山至圓通後代居訥應詔
賜紫贈大覺號於是道名大顯繼續祖燈

圓通
紀勝

可遷名真覺嶺南人住圓通一日東坡作詩訪之師於
先夜定中見空現一寶蓋霞光匝地繞獻師前上有詩
文昭人心目次日東坡果至師先誦詩坡大驚異方出
所作詩序幡蓋以獻之後自知時至告眾趺坐而逝

紀勝

慧圓南嶽十三世法嗣臨濟宗遊廬山至東林朋輩見
其貌陋皆戲侮之一日忽顛而仆了然開悟作偈書壁

卽日離東林眾傳至照覺覺大喜令人迹其所往竟無知者

五燈會元

守端字白雲初住九江承天次遷圓通故號新圓通年甚少奇異敏秀在海會郭功甫訪之師問公牛溘乎曰溘矣師叱之拱手而立師贈以偈曰牛來山中水足草足牛去山中東觸西觸晦堂曰新圓通洞徹見元不忝楊岐之嗣惜乎發用太早非叢林福後師果五十有六終於舒州海會

圓通紀勝

大慧杲九江太守朱某延說法於能仁而以圓通請住持三辭不獲因舉道顏長老補其處舊志云杲居廬山寶慶寺與無垢倡和泉石多佳什

安志

賢達頭江州人瀉山真如和尚會中角立者見地明機

鋒捷有超師之作但行業不謹一眾易之真如結庵於
方丈後令賢獨處後二年舉首眾立僧秉拂說法有大
過人處一眾由是改觀住郢州興國道大行示寂肉身

不壞

安志

道閔字圓機興化仙游蔡氏子其母夢吞牟尼珠因而
有孕生之夕異香滿室五歲口不能言足不能履一日
母攜入寺卽合掌作禮稱南無佛人大異之他日禮景
德寺德祥爲師受具後依泐潭乾和尚得悟建中靖國
時住江夏灌溪江州郡守張伯達請住圓通入院之夕
人報道濟瑲紅眾皆駭歎謂師應祖識也於是表達於
朝謂圓通有古佛應世時崇甯二年賜紫贈閔古再來
妙覺大師政和三年集眾示偈而逝壽六十八敕贈妙

空寶塢

圖通
紀勝

德止圓通禪師也六祖下十四世寶峯照嗣歷陽金紫徐閔中之季子雙瞳紺碧神光射人弱冠夢異僧授偈四句有以南安巖主像遺之者卽旁所載聰明偈自是持念不忘後一夕忽大悟力求出家父弗許欲以官授之師曰某方將脫世網不著三界豈復刺頭於利名中邪請移授從兄珏遂祝髮受具

指月錄

行機字簡堂住番陽筦山厯二十載羹藜飯黍一日下山聞路旁哀泣聲詢之一家亡兩口貧無殮具師貸衣冠葬之侍郎李椿年曰吾鄉機老有道衲子也加以慈惠及物筦山安能久處乎後郡守林叔達請主圓通法

席

圖通
紀勝

文雅嗣臨濟宗開法匡廬慧日寺所著有禪本草繼至

主席者有明禪師

府志

承古西川諸生也謁南嶽雅雅許入室遊廬山居洪覺

塢院號古塢主後范仲淹守饒迎主薦福

安志

祖可蘇伯固之子養直之弟也常住廬山葛常之云可

詩多佳句如懷人更作夢千里歸思欲迷雲一灘窗閒

一榻茶煙碧門外四山秋葉紅皆清新可喜徐師川作

畫虎行末章云卽今老舊無新句尙有廬山病可師

安志

元

李武歙縣人遊江湖遇人授以仙術施藥愈病屢驅旱
魃後於邑之鳳山嶺結茅爲廬精修數年道成一日於
酷暑暴卒曝屍日中旬餘不朽牧童異之投以石礫輒

有銅錢觸石而返於是羣兒競投以石大者得金小者得錢石聚成冢金錢遂絕後有見其在逍遙山者啟視其冢衣履存焉里人益異建廟冢旁祈禱大驗號爲眞

仙

湖口縣志

洪真人鄱陽人皓之後元末至彭澤縣南嶺結庵講說莊老及修煉之法或驅雷致雨以濟歲旱不數年坐化自令以缸覆屍三日視之惟冠服劒履存焉鄉人立廟

祀之

安志

崇裕字約之姓陳氏自幼敦素依建業龍翔寺迦禪師受具次居太平報恩寺數十載脇不至席後遷圓通號扶宗宏辯大師未入院時眾僧夢閔古再來一日自知緣畢集眾說偈面西端逝葬錦屏山下

歐陽元集

善學號古庭東林僧也久依寶覺簡講席簡深契之曰
學上人可謂名實相副者矣初出世薦福崑山越二年
歸東林專修白業謂同志曰慈雲淨土懺儀明白簡要
五悔諸文皆出華嚴吾欲藉是生安養耳

按志

中峯本住東林寺趙子昂馮海粟皆與往來本常著金
剛經略義以貽子昂見超義遂解金剛者皆不能及其
所居庵凡十數皆名幻住其作庵也馮趙爲之躬運土
木以執役云

東林寺志

悅堂祖閻南康周氏子一日閱華嚴至惟一堅密身一
切塵中現忽有省往見別山次見斷橋於言下頓悟久
之歸西林卽嗣法雙林明禪師大德九年遷靈隱居四
歲說偈坐逝爲南嶽下二十世

五燈續略

無外宗廓南昌魏氏子初參西林悅堂問溪聲盡是廣
長舌機語相契遂成印記初繼席西林後遷雲居晚住
東林說偈而逝

西林志略

明

孫化南不知何許人天啟閒愛廬山詠真洞幽秀作墓
圖其側垂成投身以入而封之留一寶劣通清濁朝夕
誦皇經禮北斗其術以清淨自然爲宗坐圓三載一夕
吐三昧火鬚眉皆焦遂蛻去

西林志略

住得湖口人元末祝髮彭澤正覺寺後入廬山證道洪
武初赤腳赴闕言國祚不報歸廬山因號赤腳僧又四
年上患熱疾殆甚得與徐道人訪天眼尊者坐食頃周
顛披草衣至天眼曰彼所持方今至尊所訪也命得送

藥服之卽愈初與王奎善永樂中奎以耆民署縣事時旱奎至廬山取水禱雨得坐石上候之書二符置壺中及衣帶閒曰至縣雨急可焚佩符記於正覺寺設醮相謝以佛燈爲驗後果如其言建醮之夕佛燈飛繞殿角望之如七星今觀音山猶存七星臺住得一名覺顯安志恒哈穆永樂閒入廬山棲水簾洞語言多莫辨久之乃省世壽一百七十四安志

惠定永樂時結茅山居先建僧寮延雲水宣德閒建佛殿像設鐘鼓藏經雲堂以至庖湑無不備具將造大鐘三千餘觔未成而逝知事性聰踵成之靈骨藏於下方

塋院尊宿塋中

西林志略

智瑛正統初住雲溪寺因號雲溪初行頭陀行負薪力

作已而有所悟生平不識文字晚乃能詩廬山自天眼
後得佛宗旨者惟智瑛云初語其徒曰某日吾當逝必
有風雷之警又報諸庵主及期既午有片雲起西北瑛
乃沐浴具威儀禮佛退與諸庵主別已而疾風雷震掣
茅墮瓦風疾旋自上下轉入空際瑛已遷化

豫章書

不佞道人天順閒居廬山石室題其壁曰一上一上上
到匡廬山眼觀四海身在五雲間芳草連天齊遮鸚鵡
綠落花滿地亂點鷓鴣斑洗鉢池邊浪生龍戲躍講經
臺畔風嘯虎生寒此處百丈紅塵飛不到清風明月讓
與道人閒後徙去莫知所終

安志

智素號靜庵嗣法雲溪瑛正德初結廬於赤腳祖塢之
側曰林隱院卽今霞封寺也有林隱語錄柳邦傑序之

志安

廣聰號古拙濠梁譚氏子徧參海內晚師靜庵和尚得入堂奧爲高峯下九世孫卜築擲筆峯下曰彌陀庵潛修不出葛寅亮易庵名爲火蓮院

志安

性空山東人得法於廣西爽庵真愛廬山遂卜居焉今青龍庵其卓錫處也空雖趺於外緣而精進不欺可爲僧範嘉靖丁巳塏於祖塏之東羅洪先爲撰碑銘

志安

了堂號徹空手闢寺踞廬山之中以黃龍潭得名堂初至玉屏風下千鹿成羣不可得近默祝曰使此閒於我有緣羣鹿當徙翌日不見鹿迹山勢環擁居然勝地桐城吳用先爲造滲金毘盧像繞殿應真大士像精巧奇麗閣中龍藏錦袱牙籤琅函方整明神宗皇母慈聖太

后所賜也

安志

仁敬號恭乾金竹坪千佛寺開山僧也慈聖太后遣使致香送滲金佛像奉安藏堂旋以行高賜紫寵之後荆國主施建寶刹壯麗甲山南北最後立枯木堂煅煉禪

客

府志

法船北直寶坻人萬厯初遊廬山卓錫於養鹿池募遠公之風合大小精舍四十餘處六時念佛以船爲宗將逝先期告眾次日有祥雲西來香風入室端坐而逝安志德清全椒人號憨山隆萬之間禪宗如線清與達觀同時以無師智豁然大悟響動天下相廬山五乳峯誅茅以居遂成禪院肉身塏於此爲曹溪迎去著有方便語大學決疑莊子影響說夢遊全集

安志

慧燈剡城人南至普陀依大智參學事畢登廬山豆葉
坪傍就竹影晏坐人蹤罕至有采藥者遙望一僧跌坐
如土塑人返道其事山中始知有燈云

府志

三昧寂光律師也萬厯間住東林乙卯至庚申凡六載
闡揚淨土宏宣梵綱四方學者如草從風後遷江淮神
爲之請戒晚寓金陵預定時日端坐而逝弟子照體號

見月住金陵華山爲宇內戒師第一

東林寺志

照真號一如竟陵尹氏子母陳夢僧託宿乃娠及誕貧
不欲舉溺之數四得人援始育焉長辭親投西塢寺凝
公薙髮受具於三昧崇禎初同王鳴玉過西林廢塢基
踏翻一磚上有字與師名同遂有復興之志時鳴玉持
節九江極力匡護浮屠殿宇不數年而具舉後受光公

記前人稱二西和尚末年主江上回龍寺未三載遽還

西林泊然坐脫

西林志略

石琳名寂玉初師慧燈後參天通磬山歸隱漢陽峯北

三十年結茅名松隱

安志

國朝

修遠號石照吉州人博通三藏經指不明然指爲誓徧

叩諸方後嗣法於若昧和尚著有楞嚴正眼華嚴法華

金剛圓覺註疏惟識起性諸論解釋蘆林陸寓航其隱

修處也一時講席著名者有水口石生蓮峯融澄鹿池

處默石生與遠尤稱莫逆云

安志

最弱號石生德安蔣氏子十二歲白父母披染於石隱

清涼公二十一秉戒雲棲徧參諸方依壽昌老人黃檗

念愍山清達觀可皆素所請益者弱以宏教利生爲念
遂就若昧受具焉閩中迎住開善寺說法傳戒眾千餘
指著有法華別楞嚴元辰金剛圓覺心經拈及宗山語
石隱詩後應講黃漢閒示微疾跣趺而逝

安志

妙光九江謝氏子初業漁晚投孤山白泉寺爲僧禪誦
精勤誓生淨土將逝先期白眾積薪如巖念佛入坐命
僧舉火火不卽然手自灼紙取燄大火聚裏恍見金如
來眾感念佛聲振林木塢在孤山寺側

安志

秀恆楚僧也參雲居顯禪師得契宗旨旋赴九江放生
十有六年生平不設牀榻硬坐如枯椿行住坐起大悲
經呪行願品不忘於心一日晏處小閣見二童子引幢
幡稽首曰上士持念佛呪能不閒停應證阿羅漢果卒

之先期別檀越力誦佛號跏趺而逝

安志

博凡名本可姑蘇人俗姓馮母高一夕夢僧投宿而娠
襁褓中喜跌坐凡見僧即合掌年二十禮慈雲老宿薙
髮後秉具於三昧律師四十六歲直造天童宏覺國師
乃蒙契證康熙甲辰道過虔州遇屠氏育仁仲僕留止
仰坪雙峯者六載庚戌遷古真如寺又十三年壬戌眾
請開法西林癸亥七月沐浴跏趺入定夜半奄然而逝
年六十八

西林志略
以上九江府

唐

五羊仙人大庾縣西南十五里有游仙鄉開元已前入
粵之路相傳騎羊五仙人由此過章水灘鄉因以名

志

勝名

郭禪師居南康縣北羊嶺旱禱弗應積薪自焚死雨隨至里人祀之名昭福觀府志

宋

巢道人上猶人幼遇異人授以辟穀法嘗經月不食自言年九十顏如童子日行三百里盛夏烈日曾不畏避忽一日謂所親曰吾明日歸去果端坐而逝明一統志

王守中嘉祐閒居玉仙館修真養靜道行超卓仁宗召至闕下深異之御書萬年觀三字易舊額歸而煉丹於觀後飛鳳山巔丹成召集里中樵牧童子頃之雲合聳身騰空而去諸童大呼空中墮下二履道侶聞而趨至又墮銅鏡一面皆化爲石上猶縣志

德賢上猶人號棲真尊者治平閒結庵了山習禪要元

豐五年九月忽自圖其容於壁閒對眾說偈云片雲歸洞本無心流水下山非有戀言訖而化弟子收靈骨建塋有禱屢應

明一統志

法總潼川人有禪學紹興戊寅至南安貢士謝堯咨與之善一日忽書十元談因語謝曰吾明日入滅君幸茶毘我更十三年同爲極樂游至明晨索浴更衣跏趺而化焚之北郊煙焰中舍利飛颺觀者如堵謝以庚寅歲

果卒

明一統志

性定住大庾蒙川館館故有泉下及爲勞以符呪之曰泉且上來與老僧洗盃逾時香積旁石竇出一水名曰

上泉

名勝志

明

大安嘉靖初坐化於南康縣之高靈山朝元閣左今塋

院尙存

名勝志以南安府

周

涓子齊人好餌朮接食其精至三百年乃見於齊釣荷
澤得鯉魚腹中符隱於宕山能致風雨受伯陽九仙法
至平固縣山中扣石忽開中有宮室額曰輪寥之館有
石笥發之得祕書十卷讀之欣然遂著天人經四十八
篇名其山曰覆笥山平固卽今興國是也

雲嶺私志謹案涓子見

列仙傳周時平固縣未聞

漢

木客在興國上洛山自言秦時造阿房宮來此因食木

實得不死嘗就民間飲酒賦詩

十道四蕃志

宋

安道士不知何許人宋元嘉中披服巾褐棲贛之赤石

山中數十年忽失所在後有復見之者竟不可卽

南康志

邱眞仙贛州人自幼慕道剏觀於文山修煉嘗鑄五龍

以鎮五方鄉民遇旱禱之卽應戲畫墨鵲能飛下啄食

後於文潭山中峯松下白日上昇有昇仙峯

贛州府志

唐 南唐埒

圓明靳黃人武德中往曹溪參六祖道經贛見一青蛇

橫道叱去復來心忽覺悟四顧山勢清高遂以錫杖插

其處祝曰曹溪還此杖存是吾道場也三年返錫杖如

故遂創寺居焉一日趺化

安志

西堂智藏虔州廖氏子七歲出家有相者謂之曰骨氣

非凡當爲法王輔佐年十三事馬祖於臨川七年遂受其法後於龔公山付授衲袈裟元和十二年歸寂塋曰大寶光郡守唐技爲之銘碑豎寶光寺初諡大宣教禪師再諡大覺禪師

傳燈錄

法通其母年七十如寐而生幼好釋師事國蹤禪師國蹤者智藏之上足弟子也居開元寺法通將復智藏舊建之所於龔公山默念觀音不食累日精感山靈靈泉湧出遠近癯者病者輒蠲獲施甚廣其塋一歲而就續碑塋

韜光禪師唐時結庵於杭州天竺法安院之西與白居易易唱和後遊贛駐錫於水東修吉寺亦以天竺名之鐫樂天詩於石而什龔真蹟以遺其徒累代寶藏宋慶厯

中蘇明允過此猶見親書墨迹後東坡至訪之僅得其

石刻有題天竺寺詩

府志

梁真人名守朴初入雩都北斗山紫霄觀學道將仙去
朝中有聞遣殿使來召真人市脯酒爲勞齋葷同釜以
瓢浮而隔之殿使臨視曰齋未熟而葷先熟何也真人
曰火候未到待拾薪來已而折檜一枝倒懸丹竈旁登
木杪浮雲而去不知所之

名勝志

僧伽姓吳名文祐家信豐祝髮爲僧聞贛廬山異秀杖
錫攀躋蛇馴虎伏居久之去雩都止明覺寺僧伽院飲
酒食肉與市井浮沈嘗持松梢行歌曰趙家天子趙家
王莫測其所謂皆笑爲狂蓋謂宋將興也孫德俊之汀
州謁定應禪師師曰汝雩陽有佛何以禮我遂告歸因

寄一扇與僧伽舟還僧伽迎問曰吾師寄扇安在由是
邑人號爲生佛祥符己酉六月六日跌化人不忍火以
金漆堊其身祀焉後忽有竹生其牀下開禧初敕封靈
濟禪師嘉禧加慈祐咸淳加慧應

安志

宋

李思聰贛縣人幼爲祥符宮道士嘗遇異人與一寶鏡
曰此神遊指南也思聰每閉戶懸鏡而臥移日方輿輒
憶其所遊洞天海嶽凡模寫六圖并題以詩皇祐間乾
元聖節將臨以呈郡守上之上喜賜號洞淵大師冲妙
先生遣中使資香茶絹匹賜之至之日羽化去

府志

劉繼先修煉於玉虛觀常坐觀之棘叢中隱隱有祥雲
覆其上提刑某自城中望見知其異人固邀入城至水

際忽凌空而去或有言其在空同山者尋迹之雙趺隱石上竟不知所往今觀有五丹井最後有丹臺則繼先所坐叢棘處也宋治平中賜觀額府志

靈照建隆中住安遠縣壽昌寺絕粒咽氣居巖罅中淳化五年示寂語其徒曰吾入壙後二十年可開視之祥符中其徒啟壙梵相如生名勝志

兜率從悅贛州熊氏子初謁雲蓋智和尚令謁洞山文和尚深領奧旨嗣真靜一日張商英按部分甯就雲巖說法甚多往復室中嘗設三語以驗學者一曰撥草瞻風祇圖見性卽今上人性在甚麼處二曰識得自性方脫生死眼光落地時作麼生三曰脫得生死便知去處四大分離向甚麼處元祐六年冬浴訖奄然而化其徒

遵遺誠欲火葬之捐骨江中無盡居士遣使持祭且曰
師於祖宗門下有大道力不可使來者無所起敬俾塋
於龍安之乳峯爲特請於朝追諡眞寂大師

安志

顯首座贛人保甯勇禪師首座賦性高逸機辨自將尋
謁端禪師於白雲旣而遊湘西寓鹿苑眞如禪師使之
分座接納久而歸贛上傳住西堂而終

釋曉瑩羅
湖野錄

行本贛縣人先是縣北百里合龍山甚荒寂有僧作草
庵山下邨農姜氏生一男垂眉長三尺不食乳日自長
大父母怪之寄之僧舍爲徒呼小道者七歲猶不能言
十二歲召至京師入宮忽能語仁宗喜詔令削髮賜名
行本錫賚珍物并後宮所賜值千萬貫還鄉創爲大寺
屢年工甫畢行本對佛合掌跏趺而逝寺中金龕羅漢

及御書法名尙存棟宇皆良材雖厠溷亦櫟木或有易
爲什器者必遭蛇虎之害一鄉敬事至今不衰

傳燈錄

元

田純靜自浙至贛修煉於景德觀一夕尸解朝天門外
令人棄之江中江水湍急尸不流口猶頌云六十八年
老拙平生不會扭捏今日撒手便行獨伴清風明月

安志

明

劉淵然贛縣人祥符宮道士師趙原陽授丹訣呼召風
雷有驗洪武二十六年召至京師見便殿賜號高道館
朝天宮永樂中從駕至北京洪熙初封沖虛至道元妙
無爲光範演教莊靜普濟長春真人賜二品印宣德初
乞骸骨特賜御製山水圖歌送歸南京朝天宮養老淵

然有道術清靜自守不干世事故爲累朝所禮張宇初之術淵然所授也年八十二卒比入殮凡七日端坐如

生

白志

淨洪新淦儒家子年十三徧參知識密授心印至雩都龍口獨肩一蒲團夜坐羣虎猝至叱之虎遁去遂結茅焉一夕召眾至前豎拂曰一領破衲衣留與易善換僧問故師曰時到便來沙桶自開沙歸大海我坐蓮臺言訖趺坐而逝時正德七年也徒如其言以沙桶封之後三年一人過庵中拜師舊方丈忽有聲如雷沙桶自開顏色如生爪髮再長僧眾訝之問其人姓名曰易善具告以故善遂以金漆聖飾之厯今法身猶存

府志

盧禪師興國縣金斗山有盧禪巖師學佛脫迹於此洞

壁鐫盧師坐禪象尙存嘉靖中邑令盧仁嘗遊此山題詩徬徨不能去自以姓與禪合更號冠巖以據有之

水漱

志林

國朝

明了蓮塘庵僧不諳文字或質以經典輒能應答有某妻病禱於賴神祠病者忽曰送明師過橋矣眾往視見明了於橋畔丙戌上元語人曰後二年邑有寇難公等蚤圖之老僧將別越五日對眾作偈合掌趺坐而逝及戊子果如所言

府志

朝宗名通忍毘陵陳氏子十歲能文年過二十披薙參密雲和尚於金粟後透澈綱宗癸未請住龔公山寶華寺先是龐居士植方竹於寺遺讖云方竹過街祖師再

來忍至適符其兆松陵葉大理紹禹爲撰塋銘

朝宗語錄以

上贛州府

漢

劉瑤英秦末人隨父華避亂石城琉璃山因食異果遂絕粒容貌頓改獨居縣西二十里山上跨一白鶴往來後仙去人名其山爲仙姑嶺

石城縣志

張麗英字金華秦漢之際石鼓山下居人張芒女年十五面發奇光家有白紈扇恆對以爲鏡他日登山得二桃食之遂忘飢渴長沙王吳芮强委禽焉女曰山有石室通洞天能穿石當爾見乃發兵通穴復使聘焉女曰吾爲金星之精降治此山豈塵凡能近乃仰臥被髮覆石上使者以爲死矣忽紫雲鬱起失女所在當冲舉時

歌詩十八章今存其五一曰石鼓石鼓悲哉下土自我
來觀民生寶苦二曰哀哀世事悠悠我意不可奪兮王
威不可屈兮余志三曰有鸞有鳳自舞自歌何爲不去
蒙垢寶多四曰凌雲爍漢遠絕塵羅世人之子於我其
何五曰暫來期會運往卽乖父兮母兮無傷我懷

名勝志

後周

謝仙翁瑞金人後周時登龍霧嶂采樵偶於池側見二
女弈從旁觀之女食桃遺核因取食之不飢弈罷恍失
所在謝駭而歸不知若干年矣自是入山莫可蹤迹里
人爲立祠名曰寶仙池曰仙女

名勝志

宋

徐繼先王齊祥俱石城太極觀道士宋大中祥符時里

有許家女爲鬼所魅訴於龍虎山張真人真人曰太極
觀有二仙盍不就近求之遂還叩觀門見紫竹臺上有
對弈者前詣乞哀爲援筆書符於許之掌令往某廟鑪
內熏之須臾雷起廟焚其妖遂息二道人投筆草中卽
去莫知所之後有商於金陵者遇之塵市中語曰汝賈
吾鄉其利當倍若去願寄二饅首於吾師商登舟引帆
睡未覺而舟已至卽以饅首昇其師熱氣猶浮浮然人
始知其爲仙去云

府志

明

曾輝字雲隱吉之永豐人少慕神仙築室飛舉峯晚遇
異人於洪都之西山授以昇元之術及雷門諸階大法
隱於甯都青陽洞律行清嚴常外出有女子潛逃洞中

自稱某家女其徒信之輝曰此魅也陰以符禁制之魅走洞外亂峯間遽呼雷劈之山石崩裂洪熙元年集其徒語以淨明忠孝之道端坐而逝

贛州府志

聞谷名行一吉安蕭氏子幼業儒長薙髮於虔州壽量寺走天台參玉林禪師目爲法器閉關數年會昌知縣王志鏊聞其道行延主護生庵登堂示眾曰徧地盡如來不生亦不住鶻眼與龍睛微妙法難覩若涉擬議魔便墮無有句空際月輪高山花啼杜宇歷遊峨嵋五臺徧參知識及老駐錫瑞金南塘年六十四卒

州志

國朝

崔曉甯都諸生慷慨好節義楊廷麟萬元吉守贛時曉與星子查某同在圍城中城破棄家斃楚蜀間至一

洞書其戶曰梅壑子至曉趨而入見三老方談笑亟使人扶出曉伏地懇留三人復笑曰諾梅壑子豈汝邪居數日復使出曰後當再來後有查晦仲者遇之南昌望湖亭曉初不顧晦仲強之至家餉以酒不食與共寢白光自曉頂中出晦仲懼以被自覆達曙闔鑰如故而曉已不知所之

贛州府志
以上富都州

江西通志卷一百八十